

**Date -18/03/2018**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

1. Hniahghnar zawka Aizawl khawpui tui intur pekna project tharthawh tur lung chu nimin khan UD&PA Minister Zodintluanga'n a phum.
2. PRISM party chuan Mizoram Budget chu vote zawna budget ni a an ngaih thu an sawi.
3. Directorate of Revenue Intelligence chuan Assam-ah Ganja cheng nuai 38 hu an man.
4. Prime Minister Narendra Modi-a'n mi retheite leh khawsak hniam zawkte ti zangkhai turin sawrkarin hma a lak mek thu a sawi.

<><><>

**UD &PA:**

Hniahghnar zawka Aizawl khawpui tui intur pekna project tharthawh tur lung chu nimin khan UD&PA Minister Zodintluanga'n a phum.

Nitina tui litre maktaduai 37 pe thei tur Aizawl tui lakna thar lung hi Tlawng lui kam, Tanhril Mualkhang rama Setlak lui chhuahah phum a ni a. Lung phumtu UD&PA Minister Zodintluanga chuan thu sawiin, Aizawl khawpui chawmtu tur Greater Aizawl Water Supply Scheme Phase I&II te hi a khawl a hlui tawh avangin nitin tui liter maktaduai 34 leh nuai 8 pump thei a ngaih an ni a. Tuna siamthar leh tum mek hi tluang taka zawh anih hun chuan nitin tui liter maktaduai 37 a pump thei dawn a. He project hi tih puitlin a nih chuan Aizawl mipui tui dawn theih chu chawhrualin nitin litre 135 a ni dawn a, kum 2033 thleng chuan tui harsatna awmlo tura ngaih a nih avangin tui mamawh a puhru thei dawn niin a sawi.

Minister chuan tuna Aizawl khawpui tui semna hman mek chu kum 39 a upa a nih tawh avangin a thara thlak a ngai tawh

dawn tih a sawi a, a thlak hna hi SIPMIU in a thawk mek nia sawiin tui pipe km 362 vel phum tura ruahmanah a zatve dawn zo tawhin thawh chunzawm mek a ni tih a sawi bawk.

Pu Zodintluanga chuan veng tina tui dahkhawlna tui zemlian pawh siambelh zel a nih thu a sawi a. SIPMIU Project hnuai hian Project -I, II, leh III ah tuizem 30 siam tura ruahman niin 19 chu zawhfel a ni tawh a, 20 dang pawh peihfel \ep a nih tawh thu a sawi a. Tui pump na atana hman tur liau liau in Power pekna tur buatsaih mek a ni a, tunah hian 132 Kv sub-station leh a hrui kalna tur tower 20 buatsaih hna pawh zawhfel mai theih turin thawh mek a nih thu a sawi bawk.

He project hi M/s Eco Protection Engineers Chennai JV leh AV Rambabu, Hyderabad ten an thawk dawn a, June 2019 ah chuan zawh vek tum a ni. Tun dinhmun ah Aizawl mipui nuai 3 sing 3 leh sang 9 awm anga chhut niin GAWSS phase I leh II te tui pump chhuah chu nitin liter maktaduai 34 leh nuai 8 a ni a, tui mamawh zat hi nitin liter maktaduai 54 leh nuai 64 nia chhut niin indaihlohna hi 19.84 mld a ni.

<><><>

PHE:

Maubawk Branch YMA leh PHE Deptt. chuan Zirtawp zan khan Aizawl khawpui tuilakna Tlawng luia Bomb hmanga Sangha man tute an man a, Police hnenah an bomb hman lainen an hlan nghal.

Maubawk Branch YMA hian report an dawn bawhzuiin, Zirtawp zan khan PHE-in tui an lakna chhak deuhah Bomb hmanga Sangha mantute Henry Lalherliana leh Lalruatzela Nursery veng, Aizawl a mite ve ve chu manin, an kut a\ang hian Geletine (Neogel) tlawn 15, Electric cape (Detonator) 23 leh Safety fuse feet 3 vel an man tel a. Bomb hi vawi hnih vel an lo ti puak hman tawh niin an insawi bawk.

PHE department-in Aizawl khawpui chawmtu tur tui an lakna a chin chhak lam thui tak thleng hi Tui a lo thianghlim zawk nan tiin Maubawk Branch YMA leh Local Council, Ailawng Branch YMA leh Local Council bakah PHE Deptt. chuan an humhalh a. Maubawk Branch YMA chuan helai humhalh chung hi zah sak turin mipuite a ngen a ni.

<><><>

LADC:

Lai Autonomous District Council a Deputy Chairman Pu LR Dingliana Chinzah chuan Lawngtlai AOC Veng a Health Clinic CENTRE thar nimin khan a hawng.

National Rural Health Mission hnuai atanga sak, Health Clinic thar hawna inkhawm, AOC Veng VCP Pu V.Lalropuia kaihhruai ah hian, bialtu MDC nibawk, Pu LR Dingliana Chinzah chuan, miharsa zawk leh chhumchhia zawk ten awlsam zawk a hriselna lama thawktute an rawn thei tur chu lawmawm a tih thu sawiin, Sorkar in mipuiten hriselna tha neih theih nan a hmalakna a kalpui chu mipuiten tangkai taka an chhawr theih nan a nihna anga hmanthiam a ngaia ni a ti a, LADC Area ah kumkalta July thla a Sorkar in Health Clinic pasarih hawn a remtih hnu ah, a hmasa ber atan Lawngtloa AOC Veng a hawntheih a ni ta chu thil chhinchhiahtlak tak a ni a ti bawk.

He hun a thusawitu dang, Chief Medical Officer Dr. Thani Pachuau chuan, thawktu indaihlohna vangin Health Clinic Centre hawntar ah thawktu nghet dah mai theih ni lo mahse, mipuite mamawhna vangin, Clinic thar vil tu tur chu ruahmanfel a ni tawh a ni a ti a, Mizoram ah hian mipui cheng tamdan atanga chhutin Health Sub Centre neihtheihzat aia tam neih a ni tawh a, inkalpawhna harsat vangin Centre pakhat huamchhung ah khaw inkarakik tak te dah a ni a, hemi avang hian mipuite mamawhna vangin Health Clinic thar chu hawn a ni ta a ni a ti.

Nimin tuka Lawngtlai AOC Veng a Health Clinic hawna ah hian Vengchhung a VC leh Tlawmngaipawl, Kohhran hruaitute leh vengchhung mipawimawhte an tel.

<><><>

PRISM:

PRISM party chuan Mizoram Budget 2018-2019 Finance Minister Pu Lalsawta'n a pharh tak chu ram hmasawn tumna lam aiin vote zawna budget ni zawka an ngaih thu leh mipui mamawh puhruk tumna budget ni pha lova an ngaih thu an sawi.

PRISM tarlan danin, sorkar chuan zu nasa zawka zawrh an tum ngei nia hriain nikum aiin zu chhiah hmuh hnem an tum a, chutihlain zu khuahkhirh kawngah an inthlahdah dawn nia ngaih theihin Excise and Narcotics-ah nikum aiin pawisa an dah tlem tih an sawi a. Chhiah tam zawk khawn tum niawm taka an lan lain chhiah khawntu ber Taxation Department chu nikum aiin pawisa pek tlem an ni a. Mipui hriselna leh hri danna lama inthlahdah an tum nia ngaih theihin Health Department chu nikum aiin pawisa pek tlem an ni a. Ranyulh hriselna leh hri dannaah pawh an inthlahdah dawn nia ngaih theihin AH&Vety Department pawh pawisa pek tlem an ni an ti.

Thingtlang hmasawna lama hnathawktu RD Department pawh ngaihthah belhin pawisa pek tlem a ni a. Electric bill nasa taka tihpun anih dawn lain a thawktu Power & Electricity Dept chu pawisa pek tlem an ni a. NEDP leh NLUP hmanga hna thar siam nasat an tum thu an sawi lain helam

buaipuitu tur Co-operation te, Commerce and Industries te, leh Labour, Employment, Skill Development and Entrepreneurship Department te pawisa tlem zawk pek an ni. Kawngchhia vanga mipui tap thawmin sorkar rilru a khawih loh zia tilang chiang em emin PWD chu nikum aain sum pek tlem a nih thu an sawi bawk.

PRISM chuan milian ho nawmchenna belhchhah an tum ni ngei turin Legislative Assembly te, GAD leh SAD te chuan sum an ngah belh nasa a. Thalai vote zawn nasat tumin Sports budget phei chu a let deuh thawa tihpun a ni an ti a. A kilkhawr lamah vote zawn an tum nasa tih hriat rengin District Council te pawh sum pek tam nasat an ni a. Hetihlai hian mipui phurrit belhchhah turin sum puk belh nasat tum a ni bawk an ti. Kum tawpa leiba tur chu Vbc 7887.04 lai niin an sawi bawk a. He budget thar hi sorkarin mipui tana hna thawh a tumna aain ruling party in insawhnghehnan leh vote zawn nana hman atana an siam ni hial zawka a lan thu an sawi a ni.

<><><>

#### DRI SEIZES 763 KG GANJA IN ASSAM

Guwahati, Assam-ah Directorate of Revenue Intelligence chuan Ganja kg.763 an man a. An Ganja man hi cheng nuaih 38 hu a ni.

Nimina sawrkar thuchhuakin a sawi danin, intelligence-te thudawn bawhzuiin Directorate of Revenue Intelligence leh Assam Police-te chuan Lakhimpur district-a Harmuti-Doimukh kawngah truck pakhat chu Ningani khan an lo enfiah a, kg 763-a tam ganja chu an man ta a ni.

He thilah hian Arunachal Pradesh-a Papum Pare district mi 2 man an ni a. Ganja hi Arunachal Pradesh atangin Assam-ah an tawlh a ni.

Directorate of Revenue Intelligence-te hian tun sawrkar kum kalmek chung hian West Bengal, Sikkim leh hmarchhak state-ah Ganja kg.8,250 an man tawh a ni.

<><><>

#### 14 KILLED IN ROAD ACCIDENT IN BIHAR'S SITAMARHI DISTRICT

Nimin tlai khan Bihar, Sitamarhi district-a bus chesualah mi 14 an thi a, midang 41 an hliam.

Hliam zingah hian na zual an awm avangin thi zat hi la pung chho thei tura ngaih a ni. Thudawnnain a sawi danin bus chesualah hian mi 60 an chuang a ni.

He bus hi chak taka a tlan lain a ke a puak a, a khalhtu-in a thunun zawh tak loh vanga chesual ni-a sawi a ni.

Chief Minister Nitish Kumar chuan he vanduaiana hi pawia a tih thu leh thi chungte hnenah zangnadawmna cheng nuaih 4 theuh pek an nih tur thu a puang a, hliamte inenkawlina senso pawh a thlawna tihsak vek tur an nih thu a sawi bawk.

<><><>

**GOVT WORKING TOWARDS SIMPLIFYING THE LIVES OF POOR: PM**

**Prime Minister Narendra Modi-a chuan mi retheite leh khawsak hniam zawkte ti zangkhai turin sawrkarin hma a lak mek thu a sawi.**

**He thu hi nimin khan Andra Pradesh-a Ugadi programme-ah, New Delhi atangin video conferencing kaltlanga a sawi a ni a. Sawrkar chuan mipuite chetlakna-in thil a tihtheihzia a hria a, a ngaipawimawh hle bawk a ni, a ti. Faina leh thianglimna kawnga mipuite kutthlakna avangin Swachh Bharat Abhiyan pawhin hma a sawn hle thu Prime Minister hian a sawi a ni.**

**Chhun zan zawma hna thawh a nih avangin kawngpui sial, rel kawng phah leh kawlphehtha sem hna pawh a leta a sawt zawk tawh thu Prime Minister hian a sawi a. Kum thum kalta chung khan Prime Minister's Housing Scheme hnuaiah chenna in Vbch khat vel sak a nih tawh thu Narendra Modi-a hian a sawi bawk a, hemi chung vek hian Ujjwala scheme hnuaiah sawrkar chuan hmeichhe khawsak harsate hnenah eirawngbawlna gas connection a thlawnin Mtd 3 leh Vbch 5 a pek tawh thu a sawi bawk a ni.**

**Narendra Modi-a chuan tunhnai khan sawrkar chuan ei chhiat lutukna laka hmalakna tur National Nutrition Program a kalpui tan thu a sawi bawk a ni.**

<><><>